



19 Julie 2020 – Virtuele Erediens

Tema: Henog... die lewe van die man  
met die vreemde doodsberig

Teks: Genesis 5:18-24 & Hebreërs 11:5-6

---

## 1. VOTUMGEBED

Vader, vanoggend wil ons hierdie erediens begin met die woorde van Dawid in Psalm 86: Leer my u pad, Here, ek wil wandel in u waarheid. Leer my om U met toewyding te dien. Dit is ook ons gebed as ons vanoggend oor Henog wil nadink... Kom vul ons met u teenwoordigheid, o Heilige Gees! En leer ons om elke dag van ons lewe saam met die Here Jesus te loop. AMEN

## 2. LOFSANG – Lied 274 – Leer my soos Henog met U wandel

## 3. SKRIFLESING – Lees Genesis 5:1-32

## 4. WOORDVERKONDIGING

Vriende, ons het sopas hierdie geslagsregister gelees wat begin by Adam en eindig by Noag... En dis maar een van vele geslagsregisters wat vir ons in die Bybel opgeteken is. Gewoonlik is die geslagsregisters dele van die Bybel wat ons maklik oorslaan, nie waar nie? Dis vir ons maar redelik vervelig om te lees van so-en-so wat pa was van so-en-so... Maar vir die Ou Testamentiese gelowiges was dit anders. Want geslagsregisters het hulle herinner aan die besondere pad wat God met mense geloop het en het dit eintlik gewys hoe Hy betrokke was by hulle.

Let daarop dat die eerste geslagsregister nie eers die naam van Kaïn se geslag noem nie. Elané het mos verlede week vir ons herinner aan die verhaal van Kaïn en Abel. Net Set se nakomelinge word genoem. Die geskiedenis van Adam, wat na God se beeld geskep is, word dus voortgesit in die geslag van Set. Onder hulle wat na die sondeval weer na God se beeld vernuwe word.

En dan vertel die geslagsregister vir ons dat Adam en Eva ook ander seuns en dogters gehad het... en dan volg die geslagsregister...

En ons lees by herhaling: EN HY HET GESTERWE. Vanaf vers 3 neem die geslagsregister amper 'n vaste patroon aan. Jy lees eers van die aantal jare

wat 'n persoon geleef het voordat hy 'n seun gehad het. Daarna word die aantal jare genoem wat die persoon geleef het na die geboorte van sy seuns en dogters. En dan – elke keer – volg die woorde: “en hy het gesterwe.” Die onvermydelike van iemand se lewe en nageslag... hy sterf.

Maar daar is een uitsondering op hierdie hy't geleef, hy't kinders gehad, hy't gesterf-ritme... En dis by Henog... Hierdie patroon van die geslagsregister word verbreek. In plaas van die refrein EN HY HET GESTERWE lees ons by Henog: En toe was hy nie meer daar nie, want God het hom weggeneem.

Hoekom sou dit so wees? Hoekom hierdie uitsondering? Hoekom hierdie vreemde doodsberig van die man, Henog?

Ek glo dat die Woord met hierdie uitsondering ons aandag so bietjie meer wil laat fokus op Henog... en dan nie noodwendig op sy sterwe nie, maar op sy lewe. Kom ek probeer dit verduidelik...

Kom ons kyk so bietjie na Henog... die lewe van die man met die vreemde doodsberig!

Oor Henog word daar in die Bybel direk eintlik nie baie gesê nie... Net op drie plekke lees ons van hom.

- Genesis 5:24 – Henog het naby God gelewe... en toe was hy nie meer daar nie
- Hebreërs 11:5-6 – Omdat Henog geglo het is hy weggeneem
- Judas vers 14-15 – dat Henog geprofeteer het

Maar ons kan tog baie aflei van Henog en sy lewe... soveel so dat ons bekende Liedboek 274 'n gebed is waarin ons vra: Leer my soos Henog met U wandel en deur geloof U te behaag... en ook vers 2 wat sê: Henog het in donker dae met U gewandel, trou en waar.

Van Henog word uitdruklik gesê dat hy met God gewandel het. In hierdie geslagsregister onderskei dit hom van die ander. Dit word twee maal genoem. Dit tipeer Henog se lewe.

En dan sou mens se eerste vraag sekerlik kon wees: Maar wat beteken dit om met God te wandel?

Kan ek dalk heel eerste sê dat 'n mens eintlik mos net wandel/stap saam met iemand van wie jy hou... iemand wat jy regtig goed ken... en met wie jy in 'n verhouding leef.

Saanstap beteken vir my intimiteit, vriendskap, lojaliteit, liefde... saamstap is vir my daai spesiale tyd wat ek en Jeanne Marié middae geniet. Saamstap is mos ook baie meer as 'n vinnige kuiertjie.

En van Henog lees ons dat hy so in 'n verhouding met God kon leef... omdat God se genade ook in sy lewe groot was. Die feit dat Henog saam met God gestap het, het dan mos ook beteken dat Henog iets van God se

TEENWOORDIGHEID verstaan en beleef het. God was nie maar net vir Henog 'n gedagte of 'n belydenis nie... maar 'n PERSOON met wie Henog in verhouding kon leef.

Verder was Henog se saamstap met God ook 'n lewensstyl. Vir 365 jaar het Henog saam met God gestap. En hierdie saamstap beteken ook vordering... groei... hulle was iewers heen oppad.

Ek kry so die prent van 'n Pa en Seun wat op 'n staptog gaan en waar die Pa vir die Seun van die lewe leer en vertel...

Vriende, beteken dit nou dat Henog hom uit die daagliksle lewe terugtrek het om so sy verhouding met God in afsondering te kon geniet? Moet ons vir Henog as 'n soort kluisenaar sien?

Nee... glad nie. Inteendeel! Henog was inderdaad 'n man met 'n vol lewe...

- Hy't nie tyd vir drama gehad nie – die feit dat daar so min oor hom gesê word bevestig dit.
- Henog was 'n patriarch en openbare figuur... anders sou sy naam nooit opgeneem gewees het in die geslagsregister nie.
- As leier van 'n familie of clan sou hy baie verantwoordelikhede gehad het in terme van regspraak, goeie orde en die algemene "bestuur" van die familie se sake.
- Maar Henog was ook 'n gesinsman... hy het seuns en dogters gehad wat verseker ook baie van sy tyd en aandag gevra het.
- En dan het Henog nog verder ook geleef in 'n redelike moeilike en goddelose tyd... daarvan vertel Judas ons huis... dat Henog ook as profeet opgetree het.

Henog was dus nie hierdie supersoort van monnik of askeet nie... Hy was 'n mens soos ek en jy... Henog wandel met God in die gewone daagliksle lewe. Hy gee sy volle aandag aan sy gesin en sy werk. Die dinge wat rondom hom gebeur, laat hom nie koud nie. Hy is aktief in die publieke lewe. Hy weet wat aangaan en hoe om dit te beoordeel. Juis vanweë sy wandel met God kan hy in daardie afvallige wêreld nie stilbly nie. En daarom tree hy as 'n profeet van God op.

En nou... die vreemde doodsberig van Henog... die uiteinde van die lewe van hierdie man wat met God saamgeloop het...

Die Bybel sê vir ons doodeenvoudig dat Henog "weggeneem" is of "dat hy nie meer was nie". Dis nogal moeilik om dit reg te vertaal en te verstaan, maar die slim mense is dit eens dat ons hierdie woorde ook kan vertaal met "kom haal" of "teruggeneem"

Dit impliseer dus dat Henog God se eiendom was wat die Here eintlik net weer kom haal het... huistoe gevat het.

Henog was natuurlik – relatief gesproke – redelik jonk... net 365 jaar. En dit terwyl baie van se tydgenote tussen 700 en 900 jaar oud geword het. In vandag se taal sou Henog dus maar 'n jongman van ongeveer 35 gewees het toe hy weggegneem is.

Iemand skryf oor hierdie vol lewe van Henog in die teenwoordigheid van God en sê: Henog het 'n voldag se werk voor middagete klaargemaak en kon daarom huistoe gaan.

En natuurlik lees ons dat sy mense hom gesoek het... dat hulle hom gemis het...

Dis die lewe van Henog... die man met die vreemde doodsberig!

Tot hiertoe Henog... Wat van jou? En my?

As ek en jy vanoggend na Henog kyk... as een van ons sogenaamde geloofshelde... wat vat ons vandag saam met ons?

Ek dink elkeen kan vir hom- of haarself daai lyne deurtrek...

- Wat beteken dit vir jou in jou lewe om saam met God te loop?
- Maak nie saak wie jy is of hoe jou lewensomstandighede is nie, so saamloopverhouding is moontlik!
- En hierdie saamstap met God is nie maar net 'n doelloze ronddrentel nie... ons stap huistoe!

Vriende, hoor net weer wat sê die skrywer van die Hebreërbrief van Henog... "van hom word getuig... dat hy geleef het soos God dit wou"

Ek weet nie van jou nie... maar mag iemand dit tog eendag van my sê as ek nie meer hier is nie!

## 5. SLOTGEBED – Ons luister na Ben Powell – "I'll walk with God"

## 6. SEËN

Die genade van die Here Jesus Christus... die liefde van God ons Vader... en die teenwoordigheid van die Heilige Gees sal met jou wees vir solank as wat jy met die Here saamloop. AMEN